

Regional News Unit AIR Aizawl
Saturday, August 10, 2024
Time - 7:30 -7:40Hrs

REGIONAL NEWS BULLETIN

HEADLINES (MORNING)

- Ramri chungchanga Mizoram leh Assam palai nimina inbia ten state pahnih inkarah remna a awm zel theih nan hmalak chhunzawm ni se an ti.
- Khawzawl District Animal Husbandry & Veterinary Hospital chu nimin khan hawn a ni.
- Union Cabinet chuan Pradhan Mantri Awas Yojana-Urban (PMAY-U) 2.0 scheme a pawm.
- Brazila thlawhna chesualah mi 61 an thi.

<><><>

MIZORAM-ASSAM BORDER TALKS

Ramri chungchanga Mizoram leh Assam palai nimina inbia ten state pahnih inkarah remna a awm zel theih nan hmalak chhunzawm zel an rem ti a, kuhva ro tawlhruk chungchangah ngaihnamna neiloa hmalak dun an rem ti bawk.

State pahnih aiawhte hi nimin khan Mizoram State Guest House, Chaltlang ah an inbia a, Mizoram lamah Home Minister Pu K. Sapdanga' n kaihhruiin Assam lamah Border Protection & Development changtu Minister Atul Bora chuan a rawn ho a, thuchhuah intawm an siam ah ramri buai hun rei tak chung lo awm tawh chu chinfel ngei ni se an ti a, ramriah remna leh muanna vawn chhunzawm zel ni se, thil duhawmlo a thlen loh nan hmalak chhunzawm an rel a, Ramri hnaih District thuneitu ve ve te'n a khat tawkin Joint Cultural and Sports Festival-te buatsaih thin se tiin hemi tur hian nakum January ni 31 ral hma ngeia hmalak ni se an ti bawk.

Inkawm zawha thuthar thehdarhtute an kawmna ah state Home Minister Pu K. Sapdanga chuan ramri chungchanga Mizoram leh Assam inrem hun tur hriat ni lo mahse inremna tuantling a awm ngei a beisei a ti a, ramri chungchanga inremna a thlen hma loh chuan ramri chhehvela District thuneitute hma la se an ti a ti a, boruak a tha zawnga a awm theih nan hmalak an rel tih sawiin sawrkar thuneituten inbiakna chhunzawm zung zung turin an rel a ti a, nakum March ni 31 ral hma ngeia Minister level inbiakna chu neih hman ngei ni se an ti tih sawiin a hmun atan Guwahati a ni dawn a ti bawk.

Assam Minister Atul Bora chuan Akashvani corr zawhna chhangin an inbiakna chuan rah tha a thlen ngei a beisei a ti a, state pahnih ten remna duhin dawhkan khat an kil a, ramriah thil duhawmlo a thlen loh nan hma an la tlang bawk a ti a, kuhva ro tawlh ruk do kawngah hma an la dun dawn tih sawiin inremna tuantling a awm theih nan ramri hnaih ah pawh hmalakna kalpui zel an tum dawn tih a sawi bawk.

Thuchhuah intawm an siam ah hian Assam leh Mizoram inrina bialtu Deputy Commissioner-te leh Superintendent of Police ten ramri hrulah remna leh muanna a awm reng theih nan thla tin virtual meeting neih rem tih a ni a, thla 6 dan ah dawhkan kil a thutkhawmna nei thin tur a rel a ni.

Heng bakah hian State pahnih a palaite hian ramri buaina chinfel kawng ah ramri hrul a chengte an pawimawh zia hria in an ni nen a tha taka thawhho a tul tih an pawm a, ramri kaihhnawih buaina leh harsatna a awm reng rengin ramri hrul a cheng mipuite leh a kaihhnawih zawng zawng ten anmahni thu a hma la nghal mai lovin thuneitute hnen ah thlen thin se tih an rel bawk.

Nimina Aizawla State pahnih hruaitute inbiakna hi kum 2022 November ni 17-a Guwahati a an inbiak hnua an inbiak lehna hmasa ber tur niin, ZPM sorkar hnuaia ramri chungchang sawihona hmasa ber a ni a,

Puan tawh thin angin, kum 2021 July thla khan State pahnih te hi ram inchuh avanga intibuaiin, silai hial hmehpuah a nih phah a, state pahnih te inrem theih nan vawi engemawzat inbiak tawh niin nimina an inbiak hi kum 2021 hnua vawi 4 an inbiakna a ni.

<><><>

SERCHHIP

Serchhip District chhunga huam chhunga zirlaite Sik leh sa inthlak danglam nasa in khawvel a nghawng dan inzirtirna nimin khan neih a ni.

He hun hi Department of Science & Technology-National Council for Science & Technology Communication (DST-NCSTC) leh Mizoram University-te bultuma neih a ni a, Serchhip District chhunga High School zirlai te tan ni 5 chhung buatsaih niin nimin khan a tiak a ni.

Sik leh sa danglam nasa in khawvel boruak a tihchhiat zel chungchanga zirtirna hi Govt Chhiahtlang High School, Govt Keitum High School leh Govt Serchhip High School-ah te nikhat zel hun hman a ni a, MZU, Mizoram State Biodiversity Board leh Govt Serchhip College-a mi thiam ten zirtirna an pe a ,Nimin nilengin HD Rosanga Hall, Govt Serchhip College-ah Art Workshop neih a ni a, High School zirlai ten Climate change chungchang zirtirna an dawn te Visual Art hmanga phochhuah dan Freelance Artist Francis Lalramdinnggheta'n a zirtir a ni. He workshop-a an kutchhuak te leh Govt Serchhip College Art Club member te kutchhuak hi HD Rosanga Hall, Govt Serchhip College-ah a duh apiang tana en theih turin August ni 9, 2024 Zirtawpni khan phochhuah a ni a. He Exhibition-ah hian High School zirlai te kutchhuak 43 leh Govt Serchhip College Art Club te kutchhuak 11 phochhuah a ni.

He project hnuaiah hian district hrang hrang pali-a High School thlan bikah seminar hi neih tur a ni a, zirtirna pe turin Mizoram chhung leh pawna Science zirna leh Research Centre-a thawkte sawm thin an ni. He project-in a ken tel, Visual Art hmanga sik leh sa danglam zel chungchang phochhuah dan hi Mizoram Academy of Arts, Aizawla zirtirtu ten an zirtir thin thung a ni.

<><><>

KHAWZAWL

Khawzawl District Animal Husbandry & Veterinary Hospital chu nimir khan AH&Vety Department Director Dr C Lalrintluangan a hawng.

Khawzawl District AH&Vety Hospital hawnna inkhawm hi Dr C Zarzokima Addl Director kaihhruaiin he hun hman puitu Khawzawl District Bawrhsap Pu K Vanlalthiana chuan District Veterinary Hospital thar hawn a ni ta chu lawmawm a tih thu a sawi a. He hospital thar hian ran vulhtute tan malsawmna a thlen ngei a beisei thu a sawi a. He Veterinary Hospital a thawktute pawh ranvultute tana theih tawp chhuah turin a chah bawk a ni.

Pu C Lalrintluanga pawhin thusawiin district pathum Khawzawl, Saitual leh Hnahthial te chu vety hospital la awm lohna khua a nih avangin chak taka hmalak a nih thu a sawi a, Khawzawla District Veterinary hospital chu Perpetual Construct & Consultancy Luangmual te sak a nih thu leh hna enkawl kawngah tualchhung mite ngei an inrawlh chu lawmawm a tih thu a sawi bawk.

Vety Director chuan damdawiin hawn thar takah hian hmanrua dah tur tam tak ala awm thu sawiin a tul zualpui chu tun dinhmuna dah a nih thu leh a tih changtlun kawngah theih tawp chhuaha hma lak a nih tur thu a sawi a, infrastructure tha Khawzawlin a nei chu a chhaw tu tur Khawzawl district mipuiten a that leh chhiat thu ah mawh an phurh thu a sawi bawk.

Animal Husbandry and Veterinary Director chuan ASF hri leng chungchang pawh sawiin, Khawzawl district chu thawktute hmalakna avanga hri leng tam awm tam lohna district a ni tih a sawi a. He hri leng avanga sum hloh chu cheng vaibelchhe 202 vel ni a chhut a nih thu sawiin chhiatna nasa tak a nih thu a sawi bawk.

<><><>

SIAHA INDIGENOUS GAMES

Doordarshan Kendra, Mizoram Indigenous Games Association leh Mara Thyutlia Py General Headquarters te buatsaih Mizoram Indigenous Games-2024 ni 2 leh zankhat awh chu Council Vaih Multipurpose Hall ah nimir tlai khan zawhfel a ni.

Mizoram Indigenous Games 2024 Siaha District chhunga buatsaih ah hian MTP Branch hrang hrang 9 an in-el a, Infiyam mi 224 in an intisiak ani. In-elna chi 6 hmanga intihsiak a ni a, Siaha District bik atan Mara infiamna chikhat 1 Awhkhytu in-elna telh a ni bawk.

Siaha DC Pu. VL. Hruaizela Kiangte chuan a kharna hun a hmanpui a. DDK leh MIGA te tangkawpin an pi leh pute infiamna chi hrang hrang hmanga thalai te tan in-elna a buatsaih chu a lawmawm hle ani a ti a, Pi leh pute infiamna bo tawh mai tur rawn thar thawh leh a District hrang hrang tana in-elna buatsaih chu tha a tih thu sawin Siaha District ah tluang taka neih zawh ani chu lawmawm a tih thu a sawi bawk a ni.

Siaha District a Indigenous games hmanga in-elna hrang hrang a lawmman pakhatna atanga pa thumna thleng dawng te hian Siaha District aiawh in Mizoram State ah Indigenous Games in-elna November 2024 a neih tur an hmachhawn leh dawn ani.

He inelnaa lawmman te hi Pu V.L.Hruaizela Kiangte leh mi pawimawh dang ten sem nghalin special lawmman Khaw pawn atanga lo kal awmchhun Chheihlu MTP te hnenah hlan an ni bawk.

<><><>

LAWNGTLAI NEP

National Education Policy (NEP) 2020 in kumli a tlin puala, Shiksha Saptah hmanmek ah nimin khan Lawngtlai Govt. Region Higher Secondary Schoolah Skilling & Digital Intivatives Day hman a ni

Shiksha Saptah Ni 5na ah hian Govt. Region Higher Secondary School zirlaite chu Zirnaa tunlai thiamna Technology a pawimawhzia Pu B. Rochanpuia IT & ITes Lecturer chuan fiah leh ngaihnaawm takin a hrilh a, khawvel thangzela Technology hmantangkai chu Zirlaite tan thiamna tak tak thlentu niin, a tellovin zirna a famkim theihlova Zirlaiten an ngaihpawimawh a tul thu tarlan a ni.

Tui thlitfim dan leh a thianghlim dan hriat dan (Water Purification Method) chu a taka entirin sawifiah a ni a, rikrum thila hliamleh tanpuingaitenkawlna hmasa (first aid) pekdan zirtir an ni bawk.

<><><>

PMAY

Union Cabinet chuan Pradhan Mantri Awas Yojana-Urban (PMAY-U) 2.0 scheme a pawm. Hei bakah hian Union Cabinet chuan Financial year 2-24-25 atanga 2028-29 chhunga kalpui tur Pradhan Mantri Awaas Yojana-Gramin (PMAY-G) a pawm bawk a ni. Union Information and Broadcasting Minister Ashwini Vaishnaw chuan PMAY hnuai hian chenna in vaibelchhe thum sak belh a ni ang a ti a. Heng zingah vaibelchhe hnih hi thingtlanga sak tur niin vaibelchhe khat hi khawpuia sak tur a ni a. Budget atangin cheng vaibelchhe nuai 3 sing 6 dah a ni ang a ti.

<><><>

RAILWAY PROJECT

Union Cabinet Committee on Economic Affairs Prime Minister Narendra Modia hova thukhawm chuan Union Ministry of Railways hnuai project pariat cheng vaibelchhe 24,657 senna tur a pawm. Hemi chungchangah hian Union Information and Broadcasting Minister Ashwini Vaishnaw chuan New Delhi ah chanchinbumite kawmin heng project te hi state pasariha district 14 ah thawh tur a ni a ti a. Odisha, Maharastra, Andhra Pradesh, Jharkhand, Bihar, Telangana leh West Bengal ah te thawh tur a ni ang a ti a. He project hmang hian aspirational district leh tribal hmunten hmasawna tam tak an hmuh belh ang a ti.

<><><>

PRESIDENT

President Draupadi Murmu-i chuan tukin khan Timoe-Leste a thleng. New Zealand-ah ni hnih a cham hnuin tukin khan Timor-Leste khawpui Dili a thleng a. Timor-Leste President leh Prime Minister te a kawm dawn a ni.

Nimin khan New Zealand-a Auckland khawpuiah India mite nen hun hmangin President Murmu-i chuan India chu mipui rorelna democracy chak tak entirtu a ni a ti a. Hun reiloteah khawvela economy lian pathumna a ni thuai dawn a ni a ti bawk.

<><><>

BRAZIL

Brazila thlawhna chesualah mi 61 an thi. Thudawn danin thlawhna hi Sao Paulo khawpui kiangah nizan khan chesualin a chhunga chuang zawng zawng an thi vek a. Thlawhna tlakna hmun hi mihring chenna hmun a ni a. Brazil thuneitute sawidanin thlawhnaah hian passenger 57 leh thawktu pali an chuang a. Parana-a Cascavel atanga thlawk chhuak niin Sao Paulo International Airport-a tum tur a ni.

<><><>